



PAENITENTIARIA APOSTOLICA

Prot. N. 10/18/I

BEATISSIME PATER,

Iacobus Habert, Episcopus Sagiensis, fiducialiter exponit: a die VII Iulii MMXVIII usque ad diem XIV Iulii MMXIX, centesimus et sexagesimus anniversarius celebrabitur matrimonii SS. Ludovici et Azeliae Martin, S. Teresiae a Iesu Infante parentum.

Ad felicem illum eventum rite celebrandum, peculiare sacrae functiones et varia spiritalia incepta habebuntur, eo intento fine ut salutaris devotio erga SS. Ludovicum et Azeliae Martin promoveatur in fidelibus et, ipsis auxiliantibus, eorum mores impensius divino Evangelio conformentur.

Quo autem abundatius fidelibus, qui dictis celebrationibus intererunt, divinae gratiae thesaurus aperiatur, Exc.mus Orator sacrarum Indulgentiarum donum a Sanctitate Tua implorat.

Et Deus, etc.


Die XIV Iunii MMXVIII

PAENITENTIARIA APOSTOLICA, de speciali mandato SS.mi Patris Francisci, Eiusdemque paternam benevolentiam perquam libenter significans, *plenariam* largitur *Indulgentiam*, suetis sub condicionibus (sacramentali Confessione, eucharistica Communionem et orationem ad mentem Summi Pontificis) rite adimpletis, a christifidelibus vere paenitentibus in Alencione, praefatae Dioeceseos, consequendam dummodo Sanctuarium coniugibus Martin dicatum, eidem adnexum S. Teresiae a Iesu Infante sacellum et Basilicam Nostrae Dominae in Caelum Assumptae, in forma peregrinationis inviserint et ibi iubilantibus celebrationibus devote interfuerint vel saltem, coram Sanctorum exuviis sollemniter expositis, per congruum temporis spatium piis vacaverint considerationibus, concludendis Oratione Dominica, Symbolo Fidei, necnon invocationibus S. Deiparae Virginis, S. Teresiae a Iesu Infante et SS. Ludovici et Azeliae Martin.

Pii christifideles senectute vel gravi morbo impediti, pariter *plenariam* consequi poterunt *Indulgentiam* si, concepta detestatione cuiusque peccati et intentione praestandi, ubi primum licuerit, tres consuetas condiciones, coram aliqua parva SS. Ludovici et Azeliae imagine, iubilantibus celebrationibus se spiritaliter adiunxerint, suis precibus et doloribus misericordiae Deo oblatis.

Quo igitur accessus, ad divinam veniam per Ecclesiae claves consequendam, facilius pro pastoralis caritate evadat, haec Paenitentiarum enixe rogat ut Sanctuarii Rector et sacerdotes opportunis facultatibus ad confessiones excipiendas praediti, prompto et generoso animo celebrationi Paenitentiae sese praebeant ac S. Communionem infirmis saepe ministrent.

Praesenti pro hac vice tantum valituro. Contrariis quibuscumque minime obstantibus.


MAURUS Card. PIACENZA
Paenitentiarum Maior


CHRISTOPHORUS NYKIEL
Regens